



Atvinnu- og nýsköpunarráðuneytið
b.t. sjávarútvegs- og landbúnaðarráðherra
Skúlagötu 4
150 Reykjavík

Stykkishólmi, 18. september 2020
nr. erindis 2009022

Á 618. fundi bæjarráðs Stykkishólmsbæjar, 17. september 2020, var tekið fyrir neðangreint erindi, sem áður hafði hlotið umfjöllun í atvinnu- og nýsköpunarnefnd Stykkishólmsbæjar.

Frumvarpi um breytingu á lögum um stjórn fiskveiða, sem snertir atvinnu- og byggðakvóta o.fl.

Lögð eru fram drög að frumvarpi um breytingu á lögum um stjórn fiskveiða, sem snertir atvinnu- og byggðakvóta o.fl. Þar er m.a. lagt til að heimild ráðherra til að ráðstafa tilteknu aflamagni í skel- og rækjubætur falli brott en að það aflamagn renni í varasjóð vegna óvæntra áfalla. Lagt er til að þetta verði gert í skrefum á tveggja ára tímabili til að veita handhöfum skel- og rækjubóta tíma til aðlögunar.

Bókun/ályktun 4. fundar atvinnu- og nýsköpunarnefndar Stykkishólmsbæjar:

Í 8. gr. laga nr. 116/2016 um stjórn fiskveiða er tiltekið að taka skuli frá 5,3% aflamagns fyrir úthlutun aflamarks til aflahlutdeildarhafa. Þessu frátekna aflamagni skal ráðstafað til ýmissa þarfa, m.a. til að mæta óvæntum áföllum.

Í apríl 2019 skipaði sjávarútvegs- og landbúnaðarráðherra starfshóp til að endurskoða meðferð og ráðstöfun þessara aflaheimilda. Starfshópurinn skilaði skýrslu til ráðherra þann 18. febrúar 2020 þar sem m.a. er lagt til að skel- og rækjubætur falli niður og að gert verði upp við þá handhafa skel- og rækjubóta sem sannað geta að þeir hafi gefið frá sér aðrar aflahlutdeildir í skiptum fyrir skel- eða rækjuveiðileyfi og hafi ekki selt frá viðkomandi heimildir í skel- eða rækju.

Það blasir við að um er að ræða mikilvægt hagsmunamál fyrir atvinnulífið og fyrirtækin öll sem reka útgerð og fiskvinnslu og nýta þær aflaheimildir sem hafa fylgt skelbótunum. Atvinnu- og nýsköpunarnefnd lýsir fullkominni andstöðu gagnvart þeim áformum sem felast í frumvarpinu sem með litlum fyrirvara gerir ráð fyrir að svipta útgerðirnar aflaheimildum og þar með skerða verulega rekstrargrundvöll fyrirtækjanna. Atvinnu- og nýsköpunarnefnd hvetur bæjarstjórn til þess að beina ályktunum sínum til þingmanna kjördæmisins og sjávarútvegsráðherra um að falla frá þeim áformum sem frumvarpið felur í sér. Tryggja verður til frambúðar þann veiðirétt sem hefur fylgt skelbótunum og festa þær varanlega sem heimildir þeirra skipa sem í dag nýta sér kvótann sem fylgir skelbótunum og var á sínum tíma byggður upp af heimildum sem skipin höfðu í skelkvóta.

**Bókun/umsögn/ályktun 618. fundar bæjarráðs Stykkishólmsbæjar:**

Bæjarráð Stykkishólmsbæjar lýsir yfir fullkominni andstöðu við frumvarp sem boðað hefur verið um breytingar á lögum um stjórn fiskveiða sem felur í sér brottfall heimildar ráðherra til úthlutunar á skel- og rækjubótum.

Bæjarstjórn Stykkishólmsbæjar hefur ávallt lagt þunga áherslu á mikilvægi skelbóta fyrir atvinnulífið í Stykkishólmi og þar með samfélagið í heild. Með þessum áformum sem felast í frumvarpinu er með litlum fyrirvara gert ráð fyrir að svipta skelútgerðir aflaheimildum og þar með skerða varanlega rekstrargrunvöll fyrirtækjanna.

Bæjarráð vill minna á að þegar aflaheimildir í skel voru kvótasettar á sínum tíma voru viðkomandi bátar skertir varanlega í botnfiski á móti og tekið skal undir með starfshópi sjávarútvegs- og landbúnaðarráðherra sem lagði til að „gert verði upp við handhafa skel- og rækjubóta sem sannað geta að þeir hafi gefið frá sér aðrar aflaheimildir í skiptum fyrir skel- og rækjuveiðileyfi og hafi ekki selt frá viðkomandi heimildir í skel- eða rækju“. Bæjarráð krefst þess að lögð verði til grundvallar í uppgjöri við handhafa skel- og rækjukvóta sú aflahlutdeild sem þeir létu frá sér á sínum tíma.

Þetta tilkynnist hér með.

Virðingarfyllst,

Jakob Björgvin Jakobsson,
bæjarstjóri.

